



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
25 Novembru 2020

Audénsia públiku kona-ba esbosu Lei Podér lokál no Desentralizasaun Administrativa no Lei Eleitorál Munisipál

JSMP remomenda atu peparu dokumentu sira iha lian Tetun no fahe antes ba partisipante sira

Komisaun A Parlamentu Nasionál (PN), iha Sesta-Feira 20 Novembru 2020 halo audénsia públiku kona-ba esbosu Lei Podér lokál no Desentralizasaun Administrativa no Lei Eleitorál Munisipál iha Munisípiu Bobonaro. Audénsia ne'e hetan partisipasaun hosi autoridade lokál, diretór munisipál, xefi suku, representante empregáriu no representante partidu polítiku sira iha munisipíu refere.

Iha introdusaun ba lei rua ne'e, Prezidente Komisaun A, distintu deputadu Joaquim dos Santos "Boro Luli" konsidera audénsia ba pakote esbosu lei sira refere, importante tanba implika direita ba serbisu autoridade munisipál sira-nian. Tanba ne'e presiza rona hanoin sira hosi parte hotu hodi bele prodús lei sira ne'e ho qualidade no bele responde ema hotu nia interese.

"JSMP apresia aas tebes ho inisiativa Komisaun A Parlamentu Nasionál ne'ebé kontinua promove partisipasaun públiku iha prosesu halo lei sira no JSMP konsidera mekanizmu ida ne'e nu'udar meu ida ne'ebé apropriadu tebes. Mezmu nune'e, JSMP husu atu esbosu lei sira ne'e tenke tradus ba lian tetun no fahe antes atu bele fasilita partisipante sira iha prosesu diskusaun nune'e lei ne'e bele refléta duni interese povu tomak nian," dehan Diretora Ezekutiva JSMP, Ana Paula Marçal.

Prezidente Komisaun A mós haktuir katak lei rua ne'e Prezidente Repúblika, Dr. Francisco Guterres Lu-Olo veta iha lejizlatura datoluk nian ho razaun katak Artigu 50 Númeru 2) la prienxe rekezitu legál no demokrátiku no konsidera membru asembleia munisipál nian tenke hothotu eleitu liuhusi eleisaun mak bele inklui mós razaun sira seluk kona-ba preparasaun munisipíu sira atu simu podér sira ne'ebé Governu Sentráal atu delega ba.

Durante diskusaun, asuntu sira ne'ebé sai hanesan preokupasaun hosi partisipante sira mak kestaun sira relasiona ho provizaun Artigu 33 kona-ba delegasaun podér sira, tanbasá tenke limita no Artigu 50 kona-ba representante veteranu na'in 5 ne'ebé sai membru Asembleia Munisipál la liuhusi eleisaun no mós lamenta ho esbosu lei rua ne'e, ne'ebé la distribui antes diskusaun inklui preokupasaun kona-ba seriedade Parlamentu nian atu diskute no aprova lei sira ne'e.

Hatan ba kestaun hirak ne'e, Prezidente Komisaun A konsidera katak preokupasaun sira ne'e iha razaun no sei toma nota hodi inklui iha relatóriu hodi bele sai materia diskusaun iha Komisaun A nian ba lei rua ne'e. Enkuantu kona-ba delegasaun kompeténsia sira, tuir Prezidente Komisaun A katak kompeténsia ne'ebé fó la'ós hotu kedas, tanba iha kompeténsia balun mak Governu sentrá labele desentraliza mak kona-ba asuntu Seguransa no Defeza, Relasaun Internasionál, rekursu naturál sira no justisa. Entretantu kona-ba Artigu 50 número 2) ne'ebé envolve veteranu sira na'in 5 no la iha direitu atu vota, Deputadu Komisaun A esplika katak ida ne'e mós hamihis itania demokrásia ne'ebé la'o ona, maibé intensaun tau artigu ida ne'e atu konsidera papél veteranu nian agora importante tebes iha nasaun ne'e no deputadu sira konsidera preokupsaun ne'e atu diskute no deside filafali artigu ne'e iha diskusaun Komisaun nian.

Iha audénsia ne'e, JSMP mós nota katak ekipa tékniku no deputadu sira la prepara materia esbosu lei sira ho lian Tetun ne'ebé sai mós nu'udar lian ofisiál ne'ebé familiár ho comunidade sira atu kompriende no la súmariza mós kona-ba importánsia husi lei rua ne'ebé sai nu'udar informasaun badak hodi bele fasilita partisipante sira iha prosesu diskusaun.

Nune'e, JSMP rekomenda atu Parlamentu Nasionál, partikularmente Komisaun A hadi'a mekanizmu audénsia públiku, liuliu atu fasilita materia sira antes ho lian Tetun no sumáriza informasaun badak hosi lei sira ne'e hodi fahe antes, nune'e bele fasilita partisipante sira hodi partisipa ativu iha prosesu diskusaun públiku ne'e.

Tuir ajenda Komisaun A Parlamentu Nasionál, sei realiza audénsia públiku hanesan ho autoridade lokál sira iha munisípiu Ermera iha 25 Novembru 2020.

Atu hetan informasaun liutan favór kontaktu:

Ana Paula Marçal
Diretóra Ezekutiva JSMP
Telefone: 77040735
Diresaun e-mail: ana@jsmp.tl
Website: <http://jsmp.tl>
info@jsmp.tl

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
luis@jsmp.minihub.org
Facebook: www.facebook.com/timorleste.jsmp
Twitter: @JSMPtl